

白狗偷食， 黑狗受罪

禮物 bē 家己 tùi 天頂 lak--落-來，錢 mā bē 家己生腳走來 chhōe--你！佇這個世間，干單「耶穌 ê 疼」會得 thang 白白免費來 hō 你得著。

➔ ■ 高英男 | 執事 ■

Hō 人頭疼 ê 阿丁

阿丁是一個小學五年 ê 學生。佇老師 ê 眼中，伊是一個 hō 人真頭疼 ê 學生，小小 ê 年紀就 m̄ 學好，頭殼內面全 té 一寡有空無 sún--ê，無一個老師看著伊無 hāiⁿ 頭--ê。

佇學校偷 thèh 錢

有一工上體育課，阿丁利用教室內底無人佇--teh ê 時陣，偷 thèh 老師 lak 袋仔內面 ê 伍仟 khó，然後將 chit 伍仟 khó，thèh 去還帳。chhun--ê 分 hō in hit 班幾個仔 kap 伊 khah 好 ê 同學，有人有份，大家鬥陣做有錢人。無按算，代誌真緊就 piak，阿丁 kap hiah--ê 有分著錢 ê 同學，一 kōaⁿ ná 肉粽 kōaⁿ--leh，全部 lóng hō 人叫去訓導處調查。

這 m̄ 是阿丁第一擺佇學校偷 thèh 錢，m̄-kú 阿丁猶原是原性不改。上 kài 衰--ê，就是 hiah--ê

有分著錢 ê 同學，lóng 做 chit-khùn 拖拖--落-去。人講：「白狗偷食，黑狗受罪！」本來 kiòh 是家己運氣 tng teh tháu，連錢 tùi 天頂 lak--落-來，也會 hō 伊 khioh--著，m̄ 知代誌大條--ah！猶 bē 赴享受--著，就 tiòh-tiàu，隨個仔隨個 hō 人 hô 起來滴水，連走閃 ê 機會 tō 無。

干單「耶穌 ê 疼」會免費

禮物 bē 家己 tùi 天頂 lak--落-來，錢 mā bē 家己生腳走來 chhōe--你！無代無誌會去 tng 著好空--ê ê 時陣，千萬 m̄ thang kā 當做是你 ê 福氣，ah 若無，親像 chit 款「白狗偷食，黑狗受罪」ê 衰運就會 chhōe 著你。

佇這個世間，干單「耶穌 ê 疼」會得 thang 白白免費來 hō 你得著。《聖經》kā 咱講：「上帝將獨生 ê kiáⁿ 賞賜世間，hō 見若信祂 ê 人 bōe 沉淪，會得著永活；祂疼世間到 án-ni。」只 tiòh「信」！🌍